

DEN AMBIENTE

CLIMAX...BANDA MUSICAL DI CARNAVAL 43....TA GRADICI HENTER PUEBLO CARNAVALESCO...

**** For di e popular cantante RUSTY, DEN AMBIENTE a ricibi un comunicado cu ta bisa textualmente:** E banda CLIMAX ya ta conoci caba pa su ritmo unico for di su inicio cu e number "BOYZ NEXT DOOR". Despues nan a bira ECLIPSE y bao di e number ey dos C.D. a ser realiza. Cu e ritmo estrictamente SOCA nan a hasi un viahe pa Santo Domingo representando Aruba durante e grandioso carnaval Caribe, na unda nan a sobresali durante nan presentacion. Despues di a confronta contratiempo di a perde nan director musical kende tabata Anthony Gario, tur hende tabata pendiente con nan lo bay funciona sin dje. Pero e guia perfecto y cooperacion di tur e integrantenan

nan a sa di logra sali for di e contratiemponan. Na momento cu nan a sali pa prome biaha den e parada di Noord aña pasa, tur hende a keda contento. Despues nan a bin hunto cu hopi briyo y conhuntamente cu Dominator Sound di Bencho Giel nan a dicidi di cambia e number pa CLIMAX. E temporada di carnaval aki e cantante Rusty no a participa den e roadmarch contest, pasobra nan a dicidi di acompaña e muchanan pa nan roadmarch contest. E parada riba su mes tabata uno hopi decente cu tanto e hendenan den e parada como esnan na banda tabata goza di nan ritmo y sonido unico. Y nan a logra despues di tres aña atrobe di conquista e titulo maximo

como BANDA DI AÑA. Nan kier gradici inmensamente Bencho Giel di Dominator Sound y tambe Elvis, tur e personanan cu a yuda durante e paradanan, tur e polisnan, Amstel cu ta nan sponser principal y tambe Eugenito Lacle di Pueblo Foodcenter. Otro siman nan lo tin un dia di celebracion na Centro di Bario Lago Hights cual entrada lo ta completamente gratis como un regalo na henter pueblo carnavalesco di Aruba. Tambe nan lo bay graba muy pronto un produccion di un C.D. E integrantenan di CLIMAX ta sumamente contento di e forma tremendo cu nan a ser ricibi y keda pendiente pasobra esaki lo ta definitivamente e AÑA DI CLIMAX.



MASTER GUSTO DI B.M.W. TA GRADICI HENTER PUEBLO CARNAVALESCO DI A ACEPTA NAN ROADJAM "AIJ...JAI..OYJOJY"..

**** Sumamente contento y satisfecho e integrantenan di e popular grupo di rap B.M.W. a keda na momento cu nan a ricibi e noticia cu nan roadjam "BROTHERS MAKING WISDOM IN JOUVERT" ("Aij...Jai..Oyjojy")..**

Asina DEN AMBIENTE por a compronde for di e autor di e roadjam aki kende ta Derwin "Master Gusto" Kemp kende conhuntamente cu Tony Twittet di St. Maarten a realiza e exitoso cancion aki cu practicamente a domina carnaval 43.

Master Gusto a relata na nos con e cu Tony Twittet a bin na idea di e roadjam. Tabata Tony su idea, Master Gusto a duna di conoce na prome instante y a sigui bisa cu e ritmo si tabata na su encargo. Conhuntamente nan a sinta traha riba e cancion sin pensa cu esaki lo bay realiza den un exito asina grandi.


Tony Twittet ta un cantante/compositor y arreglista residencia na St. Maarten, kende un tempo tabata residencia aki na Aruba. El a studia na Brooklyn, New York pa musica recientemente y a termine cu exito.

Pa Master Gusto tabata un honor grandi pa mira su cancion ser acepta den un forma masal durante e temporada di carnaval y mas orguyoso y satisfaccion ta na momento cu su cancion a ser nombra como e roadjam di aña 1997.

Den number di tur e integrantenan di B.M.W. Master Gusto kier a gradici henter pueblo carnavalesco di Aruba, Cristal Sound Factory, Super Orquesta Qua-Si, tambe na Meiller Lourens kende a duna nan e oportunidad fantastico pa presenta hunto cu Qua-Si y tambe no por lubida tur e radio-emisoranan, bandanan y brassbandnan cu a sa di toca e cancion aki pa asina e por a bira un exito aun mas grandi.

Por a compronde for di Master Gusto cu e plannan pa B.M.W. ta sumamente grandi pa aña 1997 y mirando e acohida y apoyo cu nan ta cosechando, esaki ta un estimulo mas grandi ainda pa nan por sigui deleita henter pueblo di Aruba principalmente e juventud.

Na ultimo Master Gusto a duna di conoce cu mayan e triunfo aki lo bay ser celebra engrande na Nanky Country Club hunto cu Super Orquesta Qua-Si, den style di picnic y e barbecue lo ta bross bross ala estilo "AIJ...JAI..OYJOJOGO"..



DEN AMBIENTE AWARD LO TUMA LUGAR DIA 9 DI MAART

**** No ta falta mucho pa e celebracion di e prome lustro di e galardón mas cotiza DEN AMBIENTE AWARD bay tuma lugar. E premiacion mas grandi y respeta pa nos artistanan lo bay tuma lugar diadomingo dia 9 di maart den e luhoso Tropicana showroom di Royal Cabana Casino. Durante e magno anochi di premiacion aki, lo bay rindi homenaje na nos valuarte personahenan farandulero na kende e aña aki a toca honor na Robert Jeand'or, Tico Kuiperi, Sharon Rose di Aruba, mientras di nos hermana isla Curacao Tony Sherman tambe lo ricibi su reconocimiento. E anochi aki lo ta uno super special cu presencia di e gran cantante Dominicano Johnny Ventura kende tambe lo ricibi su merecido reconocimiento di gratitud como e persona cu a habri e porta internacionalmente pa nos gran yiu di tera Robert Jeand'or. Keda pendiente pa mas informacion, ya cu e prome lustro di DEN AMBIENTE AWARD ta priminti di bay bira un anochi super campeon, na unda tur e estreyanan di Aruba lo briya riba escenario y tambe dilanti e pantaya di ATV canal 15 cu lo graba e anochi di gala pa despues transmitie riba un otro fecha..**